

SCRIPT OF MORNING GOJRI NEWS BULLETIN 29AUG 1015 HRS

مارننگ گو جری نیوز بلیٹن مورخہ 29 اگست 2025

یوہ آکا شوانی جموں ہے باغ علی طاہر تیں خبر سُنو۔

CM FLOOD THREAT

وزیر اعلیٰ عمر عبداللہ نے کہیو ہے جے بکھ بکھ جگہاں ور پانی غی سطح مانہ خاطر خواہ کمی آن غی وجہ نال ہُن فوری طور ور سیلاب غا خطرہ مانہ کمی آگئی ہے درگاہ حضرت بل مانہ عید میلاد النبی غی تقریب غا انتظامات غو جائیزو لین تیں بعد گل کرتا واں وزیر اعلیٰ نے کہیو جے لگاتار بارش ہون غی صورت مانہ سال 2014 غی س یلابی صورتحال فر پیدہ ہوجان غو خطرو ہوسکے تھو اُن غو کہنو تھو جت جت جموں مانہ پانی غی سطح مانہ فوری کمی آئی ہے آتے وادی کشمیر مانہ پانی غی سطح مانہ کمی آن مانہ خاصو وقت لگ گیو وزیر اعلیٰ نے سال 2014 غا سیلاب تیں بعد کیا گیا اقدام غو نویں سریں جائیزو لین غی ضرورت ظاہر کرتا واں صورتحال معمول ور آن غے بعد ان اقدامات غو تفصیلی جائیزو لیو جائگو اُنہاں نے سیلابی صورتحال سنگ نمڑن غی خاطر لمی تیاریاں غا سلسلہ مانہ تاولاں ہی ضروری اقدام شروع کرن غو وی ذکر کیو۔

MOBILE CONNECTIVITY

مواصلات غا وزیر جیوتی رادیہ سندھا تے سیلاب تیں متاثرہ جموں کشمیر ہماچل پردیش تے اُتر اکھنڈ مانہ موبائل رابطا بھال کرن بارے اک اعلیٰ سطحی میٹنگ مانہ جائیزو لیو ہے ٹیلی کام سیکرٹری ڈاکٹر نیرج متل مواصلات غی وزارت سنئیر عہدیدار بی ایس این ایل تے دوجی ٹیلی کام کمپنیاں غا آپریٹر اس میٹنگ مانہ شامل ہوا میٹنگ غے دوران وزیر موصوف نے متاثرہ علاقوں تے خاص کر جموں صوبہ گا ڈوڈہ تے ادھمپور ضلعان مانہ فوری موبائل فون رابطاں قائم کرن غی ہدایت کی جہڑا سیلابی صورتحال تیں زیادہ متاثر ہوا ہیں اس توں علاوہ بین ضلعائی تے وادی مانہ موبائل فون رابطاں بارے وی نزدیکی تیں نظر رکھی جارہی ہے تے تاولاں ہی خدمات کی جائیں گی۔

RANA FLOODS

جل شکتی محکمہ غا وزیر جاوید احمد رانا نے اک اعلیٰ سطحی میٹنگ غے دوران سیلاب تیں متاثرہ علاقوں مانہ پانی غی سپلائی بحال کرن بارے جائیزو لیو ہے میٹنگ غے دوران محکمہ غا عہدیداراں نے وزیر موصوف نانہ بارشاں تے سیلاب تیں متاثرہ علاقوں مانہ ٹانچہ نانہ پُجیا نقصان بارے دسیو جناب رانا نے عہدیداراں نانہ ہدایت کی ہے جے جن علاقوں مانہ پانی غی پائیاں نانہ نقصان پُجیو ہے اُن علاقوں مانہ ٹینکراں غے ذریعے پین غو پانی فوری طور ور مہیا کرایو جائے تانجے کوئے کھر وی پین غا پانی تیں محروم نہ رہ سکے سرکار غا عظم نانہ دہراتاں واں جناب رانا نے ضروری خدمات غی فوری بحالی واسطے فیلڈ عملہ غی سربنا وی کی۔

RAIL TRAFFIC

جموں دویزن مانہ کل یعنی جمعرات آلے روز وی ریل ٹریفک معطل رہی جہڑی اج لگاتار چوتھے روز وی بند رہ گی کیونجے شمالی ریلویز غا عہدیداراں نے جموں در آن

تے اتوں جان آلی 40 ٹریناں گا شیڈیول نانہ منسوخ کرن گو اعلان کیو ہے اس شیڈیول غے مطابق 24 ٹرین جموں پُجی تھیں جدکہ 16 ٹرین جموں کٹڑہ تے ادھمپور تیں روانہ کی جانی تھیں کل چھری 2 ٹرین بی چلائی گئی تھیں جن سنگ 3 ہزار تیں متا پھسیاوا مسافراں نانہ اپنی اپنی منزل در روانہ کی وگیو ہے جموں تے کٹڑہ سمیت کُج اہم ریلوے سٹیشناں ور کھان پین غو بندوبست وی کیو گیو تھو آئندہ کُج روز توڑی ریل ٹریفک لگاتار معطل رہن غو خدشو ظاہر کیو جارہیو ہے۔

NHW CLOSED

جموں سرینگر قومی شاہراہ غا ادھمپور رام بن حصہ ور پاری بارشاں غی وجہ نال کئی جگہاں ور پیشی پے جان غا نتیجہ مانہ شاہراہ اج لگاتار چوتھے روز وی بند ہے ٹریفک محکمہ غی طرفوں جاری کی گئی صلاح غے مطابق ٹریفک نانہ نگر وٹی تیں ریاسی چینی پتنی ٹاپ ڈوڈہ رام بن بانہال یا سرینگر درجان غی اجازت نئیں دتی جائگی کٹڑہ تے ادھمپور جان آلا مسافراں نانہ درخواست کی گئی ہے جے وے اپنا سنگ فوٹو شناختی کارڈ رکھیں تانجے شناخت غے بعد اُن نانہ اگے جان غی اجازت دتی جاسکے۔

WEATHER

محکمہ موسمیات نے اج دوپہر تے رات غے وقت جموں کشمیر گا کُج علاقاں مانہ ٹھوڑا عرضہ واسطے بارش تے طوفان غی پیش گوئی کی ہے اُس غے بعد کل یعنی 30 اگست تیں پہلی ستمبر توڑی

جموں صوبہ غا کُجھ ضلعان مانہ درمیانی تیں پاری بارش جد کہ زیادہ تر علاقان مانہ ہلکی تیں درمیانیہ درجہ غی بارشاں غو امکان ہے۔

SCHOOL CLOSED

جموں ڈویژن مانہ تمام سرکاری تے نجی اسکول کل یعنی 30 اگست توڑی بند ریں گا اس بارے ڈائریکٹر سکولی تعلیم جموں غی طرفوں اک حکم نامہ جاری کیو گیو ہے یوہ فیصلو جموں ڈویژن مانہ خراب موسم غی وجہ نال پیدہ شدہ صورتحال جس مانہ بڑی متی تعداد مانہ روز مرہ غی زندگی متاثر ہوئی ہے غے پیش نظر کیو گیو ہے۔

POWER WATER SUPPLY

چیف انجنئر تقسیم کاری جے پی ڈی سی ایل جموں نے گرڈیشن کنل پونی چک کٹڑہ ریاسی راجوری درابا جوڑیاں ت بن بارے بجلی غی کٹوتی غو شیڈیول جاری کیو ہے جت اج تے کل غے روز سویرے 6 بجے تیں شام 6 بجے توڑی بجلی غی سپلائی متاثر رہ گی بجلی کٹوتی غ اس شیڈیول غی وجہ نال ریاسی راجوری پونچھ جموں غا کُج علاقان کٹڑہ تے ریلوے ٹریکش نظام متاثر ریں گا ان علاقان مانہ ضروری خدمات مرحلہ وار طریقہ سنگ مہیا کرائی جیں گی واضع رہ جے خراب موسمی صورتحال غی وجہ نال بجلی ت پانی سپلائی متاثر ہوئی ہے جل شکتی محکمہ گا چیف سنجنیر جموں نے لوکاں ور زور پایو ہے جے وے پانی غو ضرورت غے مطابق کھتون کھٹ استعمال کریں تانجے مکمل سپلائی بحالی توڑی پین گو پانی میسر آسکے اُن غو کہنو ہے جے معمول غی بحالی تاولاں ہی کئی جائے گی۔

PTC ANN

علاقائی خبراں آلا شعبہ آکاشوانی جموں غی طرفوں ضلع جموں واسطے عارضی نامہ نگاراں یعنی پی ٹی سی واسطے درخواست منگی گئی ہیں۔ مجوزہ پرفارمہ ور عارضی نامہ نگار غی پوسٹ مانہہ دلچسپی رکھن آلا ایسا امیدوار درخواست دے سکیں گا جہیڑا ضلع جموں گا بسنیک ویں تے اُن غی عمر 24 براں تیں 50 براں غے بشکا ر وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا صحافت غا شعبہ مانہہ ڈگری یافر تسلیم شدہ یونیورسٹی تیں گرجویشن غے ہمراہ 2 براں غو صحافت مانہہ تجربو مقرر کیو گیو ہے۔ اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہہ تجربو وی ضروری ہے۔ عارضی نامہ نگار غی پوسٹ مانہہ دلچسپی رکھن آلا امیدوار واسطے لازمی ہے جے ضلع صدر دفتر جموں یا اس تیں 10 کلو میٹر غادائرہ غے اندر رہائش پزیر وے اس سلسلہ مانہہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ آکاشوانی پنچترتھی جموں مانہہ بزات خود

آئیندہ 31 اگست 2025 توڑی دے سکیں۔ اس بارے مزید جانکاری ویب سائٹ www.newsonair.gov.in ور دستیاب ہے۔
